

Život s poplavama



*Intervju sa gradonačelnikom
grada Bihaća,
mr.sci.Emdžadom
Galijaševićem*



❖ **AQUA:** Za vrijeme vašeg mandata, da li ste se susretali sa ovakvim ili sličnim poplavama? Ako jeste, kako i na koji način ste odlučili pomoći ugroženom stanovništvu?

❖ **Gradonačelnik Galijašević:** U maju, 2014.godine, susreo sam se sa poplavama u nekoliko mjesnih zajednica koje su zahvatile naš grad. Bila je tu riječ je o poplavama koje su prouzrokovale oborinske vode, a poplave su se desile u mjesnim zajednicama Orašac, Ripač, Veliki Lug, Čavkići i Kamenica. Kako bismo pomogli ugroženom stanovništvu poduzeli smo niz mjera, koliko je bilo u našoj moći, obezbijedili smo hranu, pitku vodu i sve potrebštine za normalan život, te smo pružili novčanu pomoć, i naravno sredstva za sanaciju uništenih objekata.



❖ **AQUA:** Smatrate li, i koliko važnim, objašnjavate ovaj problem?



❖ **Gradonačelnik Galijašević:** Ovaj problem, koji se po prirodi svojih događanja ne bi, ni pod koju cijenu, trebao zanemarivati, smatram izuzetno važnim. Te smo zbog toga poduzeli niz preventivnih mjera kako bismo, na bilo koji način, umanjili mogućnost poplava u našem gradu, a samim tim i da zaštitimo naše građane.

❖ **AQUA:** Koje mjere zaštite i sigurnosti bi vlast trebala sprovesti povodom ovog problema?

❖ **Gradonačelnik Galijašević:** Kada je u pitanju grad Bihać, prva mjera zaštite koju smo poduzeli jeste čišćenje kanala za oborinske vode, dok je druga mjera zaštite nabavka svih potrebnih sredstava za spašavanje i zaštitu građana usljed poplava. Posebno smo se fokusirali na područja mjesnih zajednica Čavkići i Ripač, gdje su mještani imali uvijek poteškoća sa oborinskim vodama, i svaka jača kiša stvorila bi probleme. Za narednu godinu planiramo već određena sredstva za nastavak čišćenja, s obzirom da je to dugotrajan proces, ali utemeljen na činjenici da je prevencija najbolji način za sprječavanje poplava.

❖ **AQUA:** Jesu li ovo, do sada, najveće poplave koje su pogodile naš region?



❖ **Gradonačelnik Galijašević:** Poplave, u maju i augustu 2014. godine, do sada su najveće poplave koje su se desile u poslijeratnom periodu, a da su pogodile naš region.

❖ **AQUA:** Šta se dogodilo sa ljudima kojima su uništena sva imovinska stanja? Da li im je pružena pomoć ? Na koji način im je pomoć pružena i kakvu su pomoć dobili?

❖ **Gradonačelnik Galijašević:** Svi građani, kojima je nanesena šteta radi poplava, dobili su novčanu pomoć za sanaciju uništenih objekata kao i sredstva potrebna za uništene poljoprivredne usjeve. Na području našeg grada srećom nije bilo potrebe za evakuacijom stanovništva.



❖ **AQUA:** Za vrijeme poplave, šta je ljudima bilo najpotrebnije omogućiti?



❖ **Gradonačelnik Galijašević:** Najvažnije je bilo spasiti ljudske živote! Zatim, evakuisati i spasiti stočni fond, te zaštititi, i na bilo koji način, spriječiti daljnje urušavanje svih objekata. Također, važno je bilo i obezbijediti pitku vodu, hranu te ostale neophodne životne potrepštine.

❖ **AQUA:** Da li je bila potrebna evakuacija stanovništva na nivou USK-a?



❖ **Gradonačelnik Galijašević:** Na svu sreću, na području našeg grada i regiona u cjelini, nije bilo potrebe za većim evakuacijama stanovništva. No evakuacija na nekim područjima regiona je bila neophodna. Svi oni koji su bili evakuisani, ubrzo su vraćeni svojim domovima.

❖ **AQUA:** Ko je od nadležnih organa ili nadležnih službi obišao poplavljena područja?

❖ **Gradonačelnik Galijašević:** Obišao sam ih lično ja, kao gradonačelnik, moji savjetnici, načelnik službe civilne zaštite, vatrogasna jedinica Bihać, pripadnici policije i oružanih snaga Bosne i Hercegovine.

❖ **AQUA:** Da li je ugroženo stanovništvo dobilo novčanu pomoć od nadležnih organa?



❖ **Gradonačelnik Galijašević:** Svi oni, koji su bili ugroženi, dobili su dio sredstava za sanaciju od Federalnog fonda za pomoć nastradalim područjima u Federaciji Bosne i Hercegovine.

❖ **AQUA:** Nakon poplava, da li ste posjetili ljude kojima su poplave nanijele veliku materijalnu štetu?

❖ **Gradonačelnik Galijašević:** I u toku poplava i nakon poplava obišao sam svoje sugrađane u naseljima Orašac, Ripač, Veliki Lug, Kamenica i Čavkići.



❖ **AQUA:** Šta smatrate da je bio glavni uzrok poplava?

❖ **Gradonačelnik Galijašević:** Glavni uzrok poplava bile su dakle obilne padavine, koje su u prosjeku iznosile preko 120 litara po metru kvadratnom, te u nekim slučajevima uzrok su bili još i loše očišćeni kanali za oborinske vode, koji nisu mogli primiti velike količine vode.

❖ **AQUA:** Kako i na koji način bi ste smanjili opasnost od poplava?

❖ **Gradonačelnik Galijašević:** Grad Bihać, preventivnim djelovanjem odnosno čišćenjem 45 do 75 km kanala, koliko ih ima u gradu Bihaću, smanjuje opasnost od poplava. To je, naravno, bilo vidljivo tokom posljednjih obilnih padavina početkom 2016. godine dok se poplave još nisu ni desile.

❖ **AQUA:** Može li se nekad očekivati, u skorijoj budućnosti, normalan život u svim poplavljenim područjima?

❖ **Gradonačelnik Galijašević:** Naravno da možemo očekivati normalan i bolji život! To se ustvari i desilo jer su moji sugrađani, nakon poplava, uz našu pomoć sanirali štetu i vratili se u svoje domove, tako da su nastavili normalan život (nastavili su sa obrađivanjem poljoprivrednih površina koje su prvobitno bile oštećene radi poplava).

❖ **AQUA:** Za kraj, želite li spomenuti neke od privatnih institucija koje su, ujedno sa vama, pomogli ugroženom stanovništvu?



❖ **Gradonačelnik Galijašević:**

Naravno! Želio bih spomenuti sve one koji su doprinijeli veliku pomoć ugroženom stanovništvu. Mogu pohvaliti intenzivan rad volontera Crvenog križa grada Bihaća, koji su bili uključeni u akciju prikupljanja pomoći, njihovom danonoćnom radu i zalaganju. Tu je i suradnja sa velikim tržišnim centrima u Bihaću, gdje je pomoć bila prikupljena, a koja je rezultirala donacijama velikih količina raznovrsnih artikala. Neizostavno je spomenuti i mljekaru „Megle“ u Bihaću, koja je, umnogome, pomogla građanima svojom donacijama. Također je potrebno spomenuti nesebičnu humanost građana grada Bihaća, koji, kako se moglo vidjeti, suosjećaju sa svim ljudima na ugroženim i poplavljenim područjima. Želio bih još reći da mi je izuzetno drago, prije svega, što sam vam pomogao u realizaciji vašeg projekta.



Drago mi je i da naš grad ima ovako mlade ljude koji se brinu o zaštiti okoliša, i koji žele znati što je moguće više o ovakvim prirodnim nepogodama, koje ne bismo trebali zanemarivati. Trebali bismo podići svijest našim građanima koliko je ovaj problem u suštini bitan, a koga ne smijemo nimalo podcjenjivati. Također, trebamo uticati i jačati svijest kod stanovništva o mogućnosti individualnog doprinosa zaštiti životne okoline, te dana taj način, utiču na razvoj ekološke odgovornosti samog pojedinca prema prirodi, te njegovog ličnog doprinosa u zaštiti prirodne okoline.



❖ **AQUA:** Hvala vam na izdvojenome vremenu i interesovanju za naš projekat ! 😊